

1268-1268- OFP - Acta Capitulum Generalium apud Viterbii Celebrati

In nomine patris et filii et spiritus sancti. Amen.

Acta capituli generalis Viterbii celebrati
anno Domini · M° · CC° · LXVIII° ·

Confirmamus has constitutiones. In capitulo de electione magistri. ubi dicitur. veniant ad capitulum generale. addatur. si vero in aliqua provinciarum provinciale capitulum fuerit celebratum. et in proximo festo penthecostes electio magistri fuerit facienda. diffinitor capituli generalis. et socius eius. sint illo anno magistri ordinis electores. In anno autem priorum provincialium. duo de diffinitoribus immediate precedentis capituli provincialis. qui primitus habitum nostri ordinis susceperunt. ad electionem magistri ordinis admittantur. quorum antiquior in ordine sit illo anno generalis capituli diffinitor. qui si ad capitulum non venerit. aut precedentis capituli extiterit diffinitor. tunc ad diffinitionem electorum alius admittatur. Et hec habet · iii · capitula.

Item hanc. In capitulo de ieiuniis. post illud. ab ecclesia institutis. addatur. et sextis feriis intus et extra. Et hec habet · iii · capitula.

Item hanc. In eodem capitulo. post precedentem immediate. quando aliquod festum habens vigiliam. in qua secundum ordinem est ieiunandum. evenerit in secunda feria. eius vigilia in precedenti sabbato ieiunetur. aliqua consuetudine non obstante. Et hec habet · iii · capitula.

Approbamus has. In capitulo de electione prioris conventualis. ubi dicitur. sicut fit in electione magistri. addatur. cum vero in aliquo conventu prioris electio fuerit facienda. non teneatur conventus expectare. vel vocare fratres vocem in electione habentes. nisi illos quos infra terminos predicacionis sue noverit constitutos. Conventibus autem quorum priores absolventur in capitulo provinciali. provideatur in eodem capitulo provinciali de prioribus per priorem provincialem. vel eius vicarium. et diffinitores capituli provincialis. Idem dicimus de conventibus illius provincie in qua generale capitulum celebratur. quorum priores per diffinitores generalis capituli fuerint absoluti. Et hec habet · ii · capitula.

Item hanc. In capitulo de graviore culpa. ubi dicitur. de conspiratoribus. nec eis aliqua obediencia iniungatur. addatur. nisi per magistrum. vel diffinitores generalis vel provincialis capituli fuerint restituti. Et hec habet · ii · capitula.

Item hanc. In capitulo de domibus concedendis. ubi dicitur. curam predictarum non recipiat nisi per tria capitula fuerit approbatum. addatur. vel nisi per dominum papam ordini committatur. Et hec habet · ii · capitula.

Item hanc. In capitulo de capitulo provinciali. ubi dicitur. alias enim plurium sententia prevalebit. addatur. si autem per adiunctionem. vel absenciam prioris provincialis. vel eius vicarii. vel casu aliquo contingente. partes fiant equales. unus ab eisdem de capitulo eligatur. et in quorum partem ille declinaverit; illorum sententia prevalebit. Et hec habet · ii · capitula.

Item hanc. In capitulo de capitulo generali. ubi dicitur. diffinitores itaque predicti. addatur. postquam fuerint accusati. quando eis videbitur expedire. excessum magistri. etc. Et hec habet · ii · capitula.

Item. In eodem capitulo. ubi dicitur. et diffinitores audiant accusantes. addatur. auditis vero accusationibus; secedat. ut eo absente. diffinitores de eius correctione conferant et disponant. Et hec habet · ii · capitula.

Item. In eodem capitulo. ubi dicitur. si vero aliqua occasione. magistrum abesse contigerit. deleatur quod sequitur usque ibi. isti autem. et dicatur sic. unus de diffinitoribus capituli eiusdem. ab ipsis diffinitoribus vel maiori parte eorum assumatur in magistri vicarium. qui durante capitulo. vices magistri gerat in omnibus duntaxat. que ad tractatum et ad acta capituli pertinebunt. qui extra capitulum locum suum teneat. et in diffinitionibus unam tantum vocem habeat. quod si in eius assumptione in partes equales se diviserint. unus de presentibus fratribus eligatur ab ipsis. et ille pro vicario habeatur; in quorum sententiam ille declinabit. cum quo vicario ceteri diffinitores in diffinitione procedant. Qui si in ipsa diffinitione iterum in partes equales se diviserint; forma superius posita teneatur. Et hec habet · ii · capitula.

Inchoamus has. In capitulo de officio ecclesie. ubi dicitur. surgant fratres dicendo officium de beata virgine. deleatur. dicendo. et dicatur sic. surgant fratres. et stando. dicant officium de beata virgine.

Item hanc. In capitulo de electione prioris provincialis. ubi dicitur. si tunc non elegerint qui debent eligere. potestas eligendi ad magistrum ordinis transferatur. deleatur totum. et dicatur sic. quod si tunc non elegerint. qui debent eligere. vel electionem fecerint. que sit irrita. ipso iure. potestas providendi ad magistrum ordinis transferatur.

Item. In eodem capitulo. ubi dicitur. poterit eum nichilominus magister ordinis confirmare. vel amovere. addatur. priores vero provinciales absoluti sint illorum conventuum. unde fuerint assumpti. nisi de eis aliter ordinetur.

Item. in capitulo de electione magistri. ubi dicitur. in anno priorum provincialium. duo de diffinitoribus immediate precedentis capituli provincialis. qui primitus habitum nostri ordinis susceperunt. addatur. qui tunc superstites fuerint.

Item. In capitulo de capitulo generali. post illud. quandoque aliud videatur. addatur. necessitate vero urgente. magister ordinis cum assensu prioris provincialis. in cuius provincia generale capitulum fuerit celebrandum. de consilio discretorum. ad alium conventum eiusdem provincie; capitulum transferre possit.

Item. In oratione. a cunctis. post illud. et beatis apostolis tuis Petro et Paulo. addatur. atque beato Dominico.

Item. In rubrica misse. ubi agitur de pace danda. ubi dicitur. in dominicis autem diebus. addatur. et festis semiduplicibus et supra.

Item. Infra. ubi dicitur. illi vero qui pacem receperunt. deleatur totum usque ibi. in ceteris autem diebus nunquam pax detur. etc.

Item. Infra. ubi dicitur. si festum duplex. vel totum duplex. in dominica evenerit. deleatur totum. et dicatur sic. in festis duplicibus. et totis duplicibus etc.

Committimus magistro ordinis. ordinationem tam studii Parisiensis. quam aliorum studiorum generalium · iiiior · provincialiarum. ut de ipsis in magistris. et bacallariis et aliis ad studium pertinentibus curam ha-beat diligentem.

Iste sunt moniciones.

Cum humilitas nostri ordinis requirat. obedire simpliciter. et non discutere sententias legatorum; volumus et districte mandamus. ut sentencie legatorum sedis apostolice. maxime cardinalium. exacta diligencia observentur. ne indignacionem sedis apostolice incurramus.

Item. Fratres quantum possunt. vitent litigia prelatorum et clericorum. questiones autem et causas de quibus potest oriri scandalum. non moveant. nisi voluntate prioris provincialis. vel capituli requisita. ubi sine periculo poterit expectari.

Item. Singulis annis. quodlibet provinciale capitulum super absolucione vel retencione prioris sui provincialis voluntatem suam insinuet capitulo generali.

Item. Piores conventuales singulis annis tractatum habeant ad minus semel in anno. cum discretis fratribus super absolucione vel retencione subprioris.

Item. Cum magister ordinis in preterito capitulo generali. mandaverit per suas litteras speciales. ut habita collacione in suis capitulis provincialibus super divisione provincialiarum et modum dividendi. sibi rescriberent in capitulo generali. nec ipsum plene certificaverint de predictis. volumus ut in sequenti capitulo. quod obmissum est suppleatur.

Item. Provideant priores conventuales. ne in locis. ubi sunt sollempnes predicaciones. fratres ad predicandum indifferenter exponant. sed paucis magis graciosis et ydoneis predicaciones huiusmodi committantur.

Item. Cum in capitulis generalibus et provincialibus negocia ordinis pertractentur. priores. et fratres qui venire tenentur. sine urgente necessitate non remaneant ab eisdem.

Item. Caveant visitatores. ne visitent instante capitulo generali vel provinciali vel eciam in · xla · ne fructum animarum impediri contingat.

Item. Ad officium sacristie semper aliquis clericus maturus ponatur.

Item. Constitucio de non recipiendis depositis; diligenciam observatur. et per priores provinciales et visitatores. transgressores durius puniantur.

Item. A recipiendis ambaxariis et legacionibus fratres quantum poterunt. se subtrahant et excusent.

Item. Caveant diligenter. ne per extraneas personas cuiuscunque dignitatis vel status. licencias aliquas. vel gracias. a prelati ordinis impetrare procurent. et qui contrarium fecerint; durius puniantur.

Item. Scholares apti ad ordinem. propter defectum vestium; nullatenus dimittantur.

Item. Fratres in missis privatis frequenter collectam pro domino papa dicant. in locis autem ubi est conventus. frequencius in missa conventuali dicatur.

Item. Magister ordinis de diffinitorum assensu interdicit prioribus et fratribus universis. ne aliquem professum in ordinibus Cisterciensium. Saccatorum. Humiliatorum. Heremitarum qui sunt de ordine sancti Augustini; ad ordinem recipiant. sine ipsius magistri licencia speciali. Qui autem contra fecerint; ipso facto. potestate recipiendi novicios sint privati. quousque cum eis per magistrum ordinis fuerit dispensatum.

Concedimus duas domos provincie Provincie. qua-rum una in Morlanis ponatur. si priori provinciali et diffinitoribus capituli videbitur expedire.

Unam provincie Francie · ii · provincie Anglie · i · provincie Polonie.

Sentencias iudicum approbamus.

Absolvimus priorem provincielem Romane provincie.

Capitulum generale sequens Parisius in provincia Francie assignamus.

Actis additae sunt litterae magistri ordinis; cf. app. n. XIX.

